

## Iluarsiissut

Siunnersuut 9. august 2024-meersoq taarserpaa  
(Inatsisilerinermi teknikikkut kukkunersiutinertigullu naqqiisoqarpoq, inatsimmilu  
allassimasuni iluarsiinerit kingunerisaannik iluarsiisoqarluni.)

Siunnersuummut nassuiaatit

### Nassuiaatit nalinginnaasut

#### 1. Aallarniut

Inuussutissarsiutigalugu aalisartut, inuussutissarsiutigalugu piniartut inuussutissarsiutigalugu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaata (aallarteqqinnissamut tapiiffigineqarnissaq pillugu inatsit) allangortinnissaanut siunnersuummi siunertaavoq aalisartut, inuussutissarsiutigalugu piniartut inuussutissarsiutigalugu nunalerinermik ingerlataqartut aallarteqqinnissamut tapiiffigineqartarnerinut periarfissat pitsaanerulersinnissaat. Tamanna ajunaarnersuaqarneranut assingusumik pisunik peqquteqartumik isertitat tamakkerlugit imaluunniit taakku ilaannik annertuunik annaasaqartunut inatsimmut ilaatinneqartunut inunnut aningaasatigut tapiiffigineqarsinnaasunut naammattumik inatsisitigut tunngavimmik pilersitsinikkut pissaq.

Tamatuma saniatigut ajoquserneq, annaasaqarneq, napparsimaneq sulisinnaajunnaarnerluunniit matussuserneqarsimatillugu imaluunniit nammineerluni imaluunniit pisortani tapiissutit assigisaalluunniit aqqutigalugit matussuserneqarsimatillugu aallarteqqinnissamut tapiissutissanik Naalakkersuisut tunniussinissaannut akornusiisut aallarteqqinnissamut tapiissuteqarnissamut aporfiit siunertarineqanngitsut peerneqarnissaannik siunnersuut siunertaqarpoq.

#### 2. Siunnersuummi immikkoortut pingaarnertit

*2.1. Aallarteqqinnissamut tapiissutisinissamut periarfissap ajornanninnerulernera*  
Inuussutissarsiutigalugu aalisartut, inuussutissarsiutigalugu piniartut inuussutissarsiutigalugu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaata (aallarteqqinnissamut tapiiffigineqarnissaq pillugu inatsit) manna tikillugu atuuttoq ajoquserneq inatsimmut ilaasoq nammineerluni imaluunniit pisortani tapiissutit assigisaalluunniit aqqutigalugit matussuserneqarsimappat assut atoruminaassimavoq. Aallarteqqinnissamut

tapiiffigineqarnissaq pillugu inatsimmi oqaasertaliussat manna tikillugu atuuttut kingunerisimavaat pisuni ikittuararsuarni inatsit piviusumik taamaallaat atuussinnaasimanera.

Inatsisip allannortinneratigut siunnersuummi § 1, imm. 1-imi pisut taaneqartut matussuserneqarsimappata imaluunniit nammineerluni imaluunniit pisortat sillimmasiinerannit matussuserneqarsimappata aallarteqqinnissamut tapiissutisisoqarsinnaannginnera aalajangiussimaneqarpoq - taamaattorli nammineq pisortallu tapiissuteqartarnermut aaqqissuussinerannut innersuussineq peerneqarpoq. Tamatuma kingunerisaanik inuk inatsisip aalajangersagaanut ilaasoq aallarteqqinnissamut tapiiffigineqarsinnaavoq pineqartoq inuussutissarsiummut attuumassuteqartumik annaasaqarsimappat, naak pineqartoq nammineerluni imaluunniit pisortaniit tapiissutisinikkut tapiissutisisimagaluartoq - assersuutigalugu pisortanit pilersugaanikkut.

Siunnersuummi § 1-imut ilaasut pisut nammineerluni pisortaniluunniit sillimmasiinermut matussuserneqarsinnaagaluartut peqatigisaanik aallarteqqinnissamut tapiiffigitinnissamut periarfissamik ikkussisoqarpoq, pineqartoq inatsimmi aningaasat amerlassusaannut killiliussamit ikinnerusunik isertitaqarpat periarfissaasumik.

Aallarteqqinnissamut tapiiffigitinneq suli inuussutissarsiornikkut annaasaqarnermik uppersarneqarsinnaasuni pisuni taamaallaat atorneqarsinnaavoq.

## *2.2. Qinnuteqarnissamut piffissaliussaq inatsisinik tungaveqartoq*

Aallarteqqinnissamut tapiissuteqartarnermut inatsimmik siunertaavoq inuussutissarsiuteqartup annaasaqarsimasup aammalu pineqartup inuussutissarsiumminik ingerlatsisinnaanissaanut kinguneqartumik annaasaqarsimasup inuussutissarsiummi tassani erngetumik ingerlatseqqilernissaa. Inatsimmi manna tikillugu atuuttumi qinnuteqarfissatut inatsimmi aalajangersarsimasumik killiliussaqqarpoq, tamatuma kingunerisaanik inuussutissarsiuteqartut ajoqusernerup pinerata qaammatit allaallu ukiut arfallit kingorna aallarteqqinnissamut tapiiffigineqarnissamut qinnuteqaatinik nassiussisarsimapput. Aallarteqqinnissamut tapiissuteqartarnermut inatsimmik siunertaq naapertorlugu ingerlatsisup inuussutissarsiummut atatillugu sakkuminik annaasaqarneranit imaluunniit ajutoornerup kingunerisaanik atortuminik toqqaannartumik ajoqusernerinit qinnuteqarnissamut ullunik 30-nik killiliussamik eqqussinissaq siunnersuutigineqarpoq. Qinnuteqarfissatut killiliussaq pisunut uppersarneqarsinnaasunut killilerneqarpoq, soorlu inuussutissarsiummut atatillugu sakkunik annaasaqarnerit pigisallu ajoquserneri.

## *2.3 Aallarteqqinnissamut tapiiffigitissinnaaneq 25.000 kr.-niit 50.000 kr.-nut qaffanneqarpoq.*

Aallarteqqinnissamut tapiissuteqartarnermut inatsimmi atuuttumi aallarteqqinnissamut tapiissutit 25.000 kr.-nut annerpaaffissalernerneqarsimapput. Tapiissutit inuussutissarsiornermi atortut akiisa ineriartornerannut naleqqunniassammata tapiissutinut tunniunneqartartunut killiliussat qaffanneqarnissaat siunnersuummi siunnersuutigineqarput. Allaffissornikkut

oqartussat aallarteqqinnissamut tapiissutit tunniussinnaasaat 2.000 kr.-niit 50.000 kr.-nut qaffanneqassasut siunnersuutigineqarpoq.

Tassunga ilanngullugu siunnersuutigineqarpoq Naalakkersuisut 25.000 kr.-nit amerlanerusunik tunniussinissamut periarfissaat peerneqassasoq, aalajangersagaq suleriaatsimi atorneqartanngimmat taamatuttaarlu 25.000 kr.-nit amerlanerusunik aallarteqqinnissamut tapiissutinik tunniussinissamut pisut qanoq ittut aallarteqqinnissamut tapiissuteqarfiusinnaanersut sukumiinerusumik nassuiarsimanngimmata. Matumani aningaasat annerpaaffissaasa 25.000 kr.-niit 50.000 kr.-nut qaffaanermi inuussutissarsiormi atortut akiisa ineriartornerat pingaartinneqarsimavoq.

#### *2.4. Tapiiffigiteqqittarnerit killileneri*

Ukiut pingasukkaarlugit inuussutissarsiormi attuumassuteqartut atortut assinganut tammarninullu aallarteqqinnissamut qinnuteqartut tapiiffigitinnissaat pillugu siunnersuutikkut killiliisoqarpoq. Taamaalilluni ukiup tulliani ajoqusernerup assinganut imaluunniit atortup assingata tammarnanur aallarteqqinnissamut tapiissutinik qinnuteqarnissamut periarfissaq aaqquissuussinermi killilernerqarpoq. Killiliineq eqqunneqarpoq, tassa qassutit aalisarnermilu atortut allat tammarneri pillugit qinnuteqarsimasunit taakkunannga aallarteqqinnissamut tapiiffigineqarnissaq pillugu qinnuteqaatit assingunik ukiut tamaasa tiguisoqartarmat.

### **3. Pisortanut aningaasaqarnikkut allaffissornikkullu kingunerisassat**

Siunnersuummiippat allannguutit pisortat atuinerunerannik kinguneqarumaartut. Allannguutit kingunerisaannik inuussutissarsiuteqartut aallarteqqinnissamut tapiiffigineqarnissaq pillugu qinnuteqarsinnaanerisa ajornannginnerulerneranik kinguneqassaaq, allaffissornikkullu 50.000 kr. tikillugit tapiissutit atugassanngortinneqarsinnaallutik. Inatsisip atuuffia allanngortinneqanngilaq, ingerlataqartullu tapiissutinik tunineqassagunik inuussutissarsiummut atatillugu annaasaqarsimanissaat suli pineqarluni. Taamaattorli allaffissornikkut amerlanerusunik tapiissutisinnaanermut ilaliullugu aallarteqqinnissamut tapiissutisinerup ajornannginnerulerneranik pisortat 1,2-1,5 mio. kr.-nik amerlanerusunik aningaasartuuteqarnerannik kinguneqassasoq ilimagineqarpoq. Aningaasanut inatsimmi konto pingaarnermi aningaasartuuteqarneruneq maannakkut akuersissutigineqareersut 3. mio. kr. iluani aningaasalersorneqarsinnaassasoq naatsorsuutigineqarpoq.

Siunnersuutikkut tapiissutaasartut qaffannissat naatsorsuutigineqarpoq, allatigullu pissutsit allanngorsimanngippata pisortani aningaasat siunertanut allanut atorneqartarneri nuutsinneqassallutik.

### **4. Inuussutissarsiortunut aningaasaqarnikkut allaffissornikkullu kingunerisassat**

Siunnersuummi inuussutissarsiuteqarnermut suliniutit pitsaasut ilaatigut annaasanut siornatigut tapiiffigineqarsinnaanngitsunik aallarteqqinnissamut tapiissutisinissamut ajornannginnerulersitsisut eqqunneqarput, taakku nammineerluni imaluunniit pisortanit tapiissutitigut matussuserneqartarsimanngimmata.

Siunnersuut aamma inuussutissarsiortunut ajortumik kinguneqartussanik suliniutinik eqqussivoq. Atortut ajoqusernerinut tammarnerinulluunniit qanoq akulikitsigisumik tapiissutinik qinnuteqaqqissinnaanermut piffissatigut killiliinikkut tamanna eqqunneqarpoq. Inuussutissarsiortunut ataasiakkaanut nalinginnaasumik ingerlaavartumik naammassisaqarsinnaanikkut aaqqissugaanikkullu ineriartornermut tatisimanninneq ilaatigut siunnersuutip annikillisissavaa, pisuni nalinginnaasuni ataasiakkaat ingerlallualernerinik iluaqutaasussaq taamaalillunilu inuussutissarsiummi isertitaqarnerulersitsilluni.

## **5. Avatangiisinut, pinngortitamut inuillu peqqissusaannut kingunerisassat**

Siunnersuut avatangiisinut, pinngortitamut imaluunniit inuit peqqissusiannut sunniuteqassasoq naatsorsuutigineqanngilaq.

## **6. Innuttaasunut kingunerisassat**

Siunnersuut innuttaasunut sunniuteqassangatinneqanngilaq.

## **7. Kingunerisassat pingaarnerit allat**

Siunnersuutip annertunerusunik kinguneqarnissaa naatsorsuutigineqanngilaq.

## **8. Pisortanik aamma kattuffinnik il.il. tusarniaaneq**

Siunnersuut piffissami 6. juni 2024-miit 5. juli 2024-mut tusarniaassutigineqarsimavoq.

Inatsimmut nassuiaatini ilanngussaq 2 innersuunneqarpoq.

## **Siunnersuummi aalajangersakkanut ataasiakkaanut nassuiaatit**

### *§ 1-imut*

Nr. 1-imut (§ 1)

### *§ 1-imut*

Imm. 1-imut.

Inatsisartut inatsisaat Kalaallit Nunaanni inuussutissarsiuteqartunut inuussutissarsiutigalugu aalisartunut, inuussutissarsiutigalugu piniartunut inuussutissarsiutigalugulu nunalerinermik ingerlataqartunut atorneqarpoq.

Inatsisartut inatsisaanni siunertarineqarpoq qinnuteqaateqartoq maannamut inuussutissarsiutigisimasaminik ingerlatitseqqittuartungussasoq taamalu pisortanit ikiorsiissutinik assigisaannillu qinnuteqartoq ikiorserneqarnani.

Aningaasat ikiorsiissutitut/tapiissutitut qinnutigineqartorpiaat tunniunneqarnerata kingunerissavaa, qinnuteqaateqartup inuussutissarsiumminik ingerlatitseqqissinnaanera. Inatsisartut inatsisissaanni annaasanut matussuserneqarsinnaanngitsunut imaluunniit nammineerluni imaluunniit pisortatigut sillimmasiinernit matussuserneqarsinnaanngitsunut tapiissutisinissamut periarfissatut eqqarsaataavoq, takuuk §2.

Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlatsisut pillugit nassuiaammi taaguutit taakku nalinginnaasumik nassuiaataannut sukkulluunniit atuuttumut innersuussisoqarpoq.

Aalajangersagaq malillugu 1) atortut ajoqusernerini, 2) inuussutissarsiummut tunngasut atortut tammarnerni, 3) ilungersunartumik napparsimanermi allatigulluunniit timikkut peqquteqartumik sulisinnaajunaarnermi imaluunniit 4) inuussutissarsiutikkut annaasaqarneq pillugu aallarteqqinnissamut tapiiffigineqarnissamut qinnuteqartoqarsinnaavoq.

Tassani tunngavigineqarpoq § 1, imm. 1-ip oqaasertai malillugit sukangasuumik nassuiarneqarnissaa.

Inatsit aamma annaasaqarsinnaanermut pisunut inissaqartitsivoq. Matumani pisut imatut paasineqassapput ajoqusernerit suli pisimanngitsut pinissaannulli aarlerinartut. Aalajangersakkap atorneqarsinnaaneranut assersuutissaqqissoq tassaavoq piffissat qimmit qimuttut nerukkaatissaannik naammattumik isumalluuteqarfiunngitsut. Qimmit

nerukkaatissaqanngippata atorneqarsinnaajunnaassapput, taamaalilluni aalajangersagaq pitsaaliuinerit suliniutaavoq, pineqartoq tapiissutiniq pissarsinngippat inuk inuussutissarsiornermut tunngasuni annaasaqassalluni taannalu piviusumik annaasaqarsimappat aallarteqqinnissamut tapiissutisisinnaassalluni.

Atortut "inuussutissarsiornermut tunngasuunerannut" aalajangiisussaavoq inuussutissarsiutip ingerlannissaanut atanersut pisariaqarnersullu.

Nr. 1)

Aalajangersakkamut ilaapput pisut, pigisanut aalaakkaasunut aalaakkaasuunngitsunullu ajoqusernerit, assersuutigalugu illumi, angallammi motorimiluunniit ajoqusernerit.

Ajoqusernermut uppersaataatit assersuutigalugu assitigut uppersaataat pisimasullu allaaserineqarnera, takunnittup oqaaseqarnerata assilinerarnera, nalunaarutiginninnerup uppersaataa il.il. nassiunneqarsinnaapput.

Uppersaanissamut piunnaasaqatit pillugit malittarisassanik erseqqinnerusunik Naalakkersuisut aalajangersaasinnaapput, tak. § 1, imm. 3, tassunga ilanngullugu iluoorluinnarnermik nalunaarutip atsiorneqarsimanissaa pillugu piunnaasaqammik aalajangersaaneq.

Nr. 2)

Aalajangersagaq amerlanertigut qassutiniq annaasaqarnermut atorneqartarpoq, taakkunungali killeqartinneqarnani. Aalajangersagaq taanna malillugu tammartut uppersarneqarnissaat piunnaasaqataavoq taamaattumillu naammattumik uppersaateqanngippat aallarteqqinnissamut tapiissutiniq qinnuteqartoqarsinnaanani. Qassutit tammarnerni uppersaataat assersuutigalugu tassaasinnaavoq oqartussanut attuumassuteqartunut nalunaarutigineri imaluunniit politiinut nalunaarutigineri. Aalisarnermut atortut annaasat qimatallu pillugit nalunaaruteqarnissamut uppersaasersuinissamullu periutsit allat Piujuartitsineq siunertaralugu aalisarnerup teknikikkut iluarsartuussivigineqarnera pillugu Namminersorlutik Oqartussat nalunaarutaanni nassuiarneqarput. Uppersaataat qinnuteqaammut ilanngunneqassaaq.

Ingerlataqartoq assersuutigalugu tunitsivimmiit atortunik nutaanik pissarsisimappat pineqartoq peqatigisaanik Naalakkersuisuniit aallarteqqinnissamut tapiissutisisinnaanngilaq. Nalaakkersuisoqarfik akisussaasoq suliamik suliarinninnermut atatillugu paasissutissanik naammattunik pissarsisarnissamut tunngavik naapertorlugu tunitsivinniit attuumassuteqartuniit paasissutissanik pissarsiniarsinnaavoq. Peqataasumik tusarniaanissaq pillugu ingerlatsinermi inatsisini malittarisassat soorunami isiginiarneqassapput.

Nr. 3)

Aalajangersakkami aalajangersarneqarpoq nappaammik allatigulluunniit timi atorlugu sulisinnaajunnaarnermik peqquteqartumik inuussutissarsiornikkut annaasaqarneq pillugu aallarteqqinnissamut tapiissutinik ingerlataqartoq qinnuteqarsinnaasoq.

Tamanna imatut paasineqassaaq ingerlataqartoq assersuutigalugu atortunik nutaanik annaasaminik imaluunniit napparsimanerup nalaani sulisinnaannginnini pissutigalugu aseroriartorsimasunik pisinissamut qinnuteqarsinnaasoq.

Aalajangersagaq taamaalilluni inuussutissarsiutip aallarteqqinnissaanut attuumassuteqanngitsumik aamma aallarteqqinnissamut tapiissutit pillugit inatsisip atuuffiata avataaniittunut sulinermi iluanaarutinik annaasat allatigulluunniit aningaasatigut taarsiissutissat pillugit aallarteqqinnissamut tapiissutisisoqarnissaanut periarfissiinngilaq.

Napparsimanerup qanoq paasineqarnissaanut apeqqutaavoq nakorsat napparsimaneq qanoq paasisarneraat. Pingaarneruvoq inuup sulisinnaajunnaarsimaneq. Taamaattumik tapiissutinik qinnuteqaateqarnermi nakorsap uppersaataa ilanngunneqassaaq. Piumasarineqanngilaq napparsimanerup qanoq sivilutiginera ilanngunneqassasoq. Pingaarnerusooq tassaavoq napparsimanerup nalaani inuussutissarsiummut tunngatillugu annaasaqarsimaneq inuutissarsiummut uteqqinnissamut ajornarnerulersitsisoq. Assersuut ataaseq tassaavoq piffissaq napparsimaffiusooq napparsimaneq pissutigalugu aserfallatsaaliuisimannginneq pissutigalugu inuussutissarsiummut tunngasunik atortut ajoquserneri imaluunniit napparsimaneq pissutigalugu aaneqarsinnaanngitsut qassutit aserorneri/annaaneqarneri.

Nr. 4)

Aalajangersagaq tassaavoq aalajangersakkanik katersiffiusooq, oqaasertaata nassuiarnerani imm. 1, nr. 1-3-mut ilaanngitsut malillugit pisunut inissaqartitsinissaq, kisiannili pisunut tapiissuteqarfiusinnaasunut eqqaanartut pisimallutik. Aalajangersakkami tassani pingaarnerutillugit sammineqarput pisut assigiinngitsunut tamanut tunnganeruset. Tassa imaappooq pisut inuit ataasiakkaat kisiisa eqqornagit inuiaqatigiit ilaanut amerlanernut eqquisut. Aalajangersagaq pisuni immikkorluinnaq pisuni atorneqarsinnaavoq qaqutigoortuusutullu pissuseqartariaqarluni. Taamaattumik pisariaqarluinnarpoq aalajangersagaq taanna malillugu aallarteqqinnissamut tapiissutisinermut atatillugu inuussutissarsiornikkut akornutit assigisaaluunniit pillugit erseqqissunik kinaassusersiunngitsunillu piumasaqaateqarnissaq.

Pisut taakku tassaasinnaapput orsussap akiisa nalinginnaasuunngitsumik qaffanneri assigisaaluunniit, taakkununnigali killeqartinneqarnatik. Aalajangersagaq aamma pisuni qimminut qimuttunut nerukkaatissat naammakkunnaarnerini imaluunniit qimminut nerukkaatissat akiisa nalinginnaasuunngitsumik qaffannerini imaluunniit qimmit qimuttut akuttunngitsumik nerukkaatissaannut innuttaasut naammattumik akissaqarnissaannik akornusiisuni atorneqarsinnaavoq.

Aalajangersagaq taanna innersuussutigalugu aallarteqqinnissamut tapiiffigineqarnermi soqutigisaqaqatigiinni kattuffik attuumassuteqartoq tusarniaaffigineqassaaq, tak. § 3, imm. 4.

Imm. 2-mut.

Pisut ajunaarnersuartut ittut tassaapput pisut tassanngaannartut siumullu naatsorsuutigineqarsinnaanngitsut, taamatullu annikigisassaannngitsut najukkamilu innuttaasut oqartussaasullu ulluinnarni isumalluutitut pissarsiarisartagaannut sunniteqartumik ajutoorfiusimasut. Aallaaviatigut ingerlatsisoq ataasiinnaq pisumit sunnertissimaguni pisoq tassaasimassanngilaq ajunaarnersuartut ittoq tassanngaannartumik pisimasoq.

Aalajangersagaq malillugu assersuutigalugu tapiissutit nunalerisumut tunniunneqarsinnaassapput nunalerisup naatsiaatai, uumasupilunnit kissakkiartorneratigut Kalaallit Nunaannukarsimasunit, siornatigullu ilisimaneqanngitsunit nalinginnaasuniilluunniit aserorterneqarsimappata. Aammattaaq sikoqarpiannginera imaluunniit sikoqarpallaarnera pissutigalugu inuussutissarsiummik ingerlatsisinnaanngitsunut aalisartunut imaluunniit piniartunut piniakkani nappaateqartoqarnera assersuutigalugu Chronic Wasting Disease (CWD) pisassat malunnartumik ikilinerini tapiissuteqartoqarsinnaavoq.

Aalajangersagaq taanna malillugu tapiissutit aalajangersimasumik ataasiakkaanit qinnuteqartoqarneratigut aamma soqutigisaqaqatigiit kattuffiinik attuumassuteqartunik tusarniaanerup kingorna tunniunneqarsinnaapput, tak. § 3, imm. 4.

Imm. 3-mut.

Imm. 1-2-mi pisunut taaneqartunut uppersaanissamut piumasaqaatit pillugit malittarisassanik nalunaarut aqutugalugu erseqqinnerusunik aalajangersaanissamut Naalakkersuisut piginnaatinneqarput. Tassunga ilanngullugu annaasaq pillugu uppersaanissamut piumasaqaatit pillugit malittarisassat kiisalu pineqartup aallarteqqinnissamut tapiiffigineqarmissaaq pillugu qinnutigineqartunik pigisanik pineqartup pisisimaneramik peqarsimaneranillu uppersaanissamut piumasaqaatit pillugit malittarisassanik atulersitsisoqarsinnaavoq.

Nr. 2-mut (§ 2)

§ 2-mut

Imm. 1-imut

Oqaaseq "matusineq" imatut paasineqassaaq pisoq patsisigalugu aningaasanik tunniussineq. § 2, imm. 1 malillugu aamma pisoq pisortanit nammineerluniluunniit sillimmaserneqarsinnaassanngilaq.

Tapiissutit sillimmasiisarfinnut unammilleqatigiinnermik equngalersitsisutut sunniuteqaqqusaanngillat, tak. Unammilleqatigiinneq pillugu Inatsisartut inatsisaat nr. 1, 15. maj 2014-meersoq, (Unammilleqatigiinneq pillugu inatsit). Tamanna imatut paasineqassaaq aallarteqqinnissamut tapiissutit namminersortut sillimmaseeriaasiinut aalajangersimasunut taartaasussatut issanngitsut.

Suulluunniit sillimmasersinnaanerinit apeqqutaavoq nammineerluni imaluunniit pisortat sillimmasiinerisigut annaasaq sillimmaserneqarsinnaanersoq. Innuttaasunut inuussutissarsiummut pineqartumut atasumik nalinginnaasut aallaavigalugit sillimmatinik nalinginnaasutut isigisariaqartunik pisinermikkut annaasaqarnerminnik pinngitsoortitsisimasinnaagaluartunik taamaaliorisimangitsunulli tapiissuteqartoqarsinnaassanngilaq. Aalisartoq assersuutigalugu angallammi inuussutissarsiummi umiatsiaaqqamiluunniit motori sillimmaserneqarsimangippat aallarteqqinnissamut tapiissutisinissaq ajornassaaq. Aalajangersagaq taanna malillugu aallarteqqinnissamut tapiissutit taamaalillutik qaqutigootutut iluseqassapput pisunilu sillimmaserneqarsimangitsuni taamaallaat atorqarsinnaalluni, assersuutigalugu qassutit tammarnerni.

Taamaattorli inuk inatsimmut ilaasoq, kisiannili sillimmasiinissamut aningaasaqarnikkut pisinnaasimangitsoq, piumasaaqammut tassunga ilaatinneqassanngilaq, tak. imm. 2.

"Pisortat sillimmasiinerini" pingaartumik pineqarput Kalaallit Nunaanni sulinermi ajoqusernermut sillimmasiineq pillugu inatsit pillugu nalunaarut aqqissuussinerillu assingusut malillugit tunniunneqartut.

"Nammineerluni sillimmasiineq" tassaavoq nammineerluni sillimmasiinermik neqeroortuniit assigisaannilluunniit sillimmasiinikkut sullinneqarnerit.

Imm. 2-mut

Aalajangersagaq sillimmasiinissaq pillugu piumasaaqammut saneqqussineruvoq, tak. imm. 1, ajoqusernermullu sillimmasiinermik matussuserneqarsinnaasumut aallarteqqinnissamut tapiissutisinissamut qinnuteqartumut periarfissiisoq, sillimmasernissamullu akiliutip aningaasaqarnermut pissutsit pissutigalugit qinnuteqartumut periarfissaasimangitsoq.

Aalajangersagaq taanna malillugu aallarteqqinnissamut tapiissutinik tunniussineq aalajangersimasumik missiliuinikkut pissaaq. Aallarteqqinnissamut tapiissutit qinnuteqartoq inuussutissarsiummut sillimmasernissamut pisarialimmik nammineq aningaasaateqanngippat tunniunneqarsinnaapput.

Aalajangersakkami piumasaaqatit marluk uku naammassineqassapput:

Inuussutissarsiorluni aalisartoq, inuussutissarsiorluni piniartooq inuussutissarsiorluniluunniit nunalerinermik ingerlatsisoq qinnuteqarneq sioqqullugu ukiuni pingasuni isertitaqarsimassaaq

1) ukiumut agguaqatigiissillugu 250.000 kr.-nik ataallugilluunniit isertitaqassaaq, aamma

2) agguaqatigiissillugu 100.000 kr.-nik ataallugilluunniit nalilinnik pigisaqassaaq.

Isertitanut tunngaviusooq kinaassusersiunnngitsumik nalilersuinissamut tunngaviuvoq, imatut paasillugu, qinnuteqarnerup nalaanit ukiut pingasut sioqqullugit ukiumut agguaqatigiissillugit 250.000 kr.-t sinnerlugit isertitaqartoq § 1-imi pisunut taaneqartunut aallarteqqinnissamut tapiiffigineqarsinnaanngilaq pineqartoq sillimmasersimappat.

Taamaattumik aalajangersakkami aallaavigineqartoq tassaavoq pineqartoq ukiumut agguaqatigiissillugu 250.000 kr.-nik isertitaqarpat agguaqatigiissillugulu annerpaamik 100.000-nik nalilinnik pigisaqarpat tapiissutisisinnaasoq. Ukiumut isertitat akileraarutitigut paasissutisatigut uppersarsarneqarsinnaapput. Qinnuteqarnerup nalaanit ukiut siuliini qinnuteqartup ukiumoortumik naatsorsuutai pingasut atorlugit pisuussutsimut piumasaqaat naammassisimallugu uppersarsarneqarsinnaavoq.

Nr. 3-mut (§ 3)

### § 3-mut

Imm. 1-imut

Aallarteqqinnissamut tapiiffigineqarnissaaq pillugu qinnuteqaat imm. 2-mi suleriaatsit aalajangersarneqarsimasoq malillugu naalakkersuisoqarfimmuut akisussaasumut nassiunneqassaaq.

Imm. 2-mut

Inatsimmi piumasaqaatit tunuliaqutaralugit illersorneqarsinnaasumik sullissinissamut piumasaqaatinik naammassinnittumik qinnuteqarnermi immersugassamik Naalakkersuisut suliaqassapput. Qinnuteqaateqarnermut immersugassami tassani piumasarineqassaaq pissutsit pisariaqartut tamarmik ilisimatitsissutigineqarnissaat. Aammattaaq missingersuutitigut assigisaatigulluunniit tapiissutit Inatsisartut inatsisaata siunertaanik naammassinninnerata ilimanarnera pillugu piumasaqaateqartariaqarluni. Qinnuteqaateqarnermi immersugassaaq suliat suliarineqarnerannut naleqqussartuarneqarsinnaavoq.

Pissutsinut § 1, imm. 2-mi eqqartorneqartunut immikkut qinnuteqariaasiliortoqarsinnaavoq.

§ 5 naapertorlugu atorsinnaanissamut innuttaasup utertillugit akileeqqusaasinnaanermik ilisimatinneqarnissaa piumasaqaataanngilaq. Taamaattorli aqutsinermili pissuserissaarnerup

ilagaa utertillugit akileeqqusaasinnaanerup nalunaarutigineqarsinnaanera.  
Qinnuteqaateqarnermi immersugassaq § 3, imm. 2-mi taaneqartoq aqputigalugu tamanna  
pisinnaavoq.

Allannguutit pillugit ilisimatitsinissamut pisussaaffik, tak. § 5, imm. 2, qinnuteqaateqartumut  
ilisimatitsissutigineqartariaqarpoq. Tamanna pisinnaavoq qinnuteqaateqarnermi  
immersugassaq aqputigalugu.

Ajoqusernermut tammartunulluunniit aallarteqqinnissamut tapiiffigineqarnissaq pillugu  
qinnuteqaatip, tak. § 1, imm. 1, nr. 1-2, pisup kingorna kingusinnerpaamik qaammat ataaseq  
qaangiutsinnagu nassiunneqarnissaa pillugu piumasaaqat inatsimmi eqqunneqarpoq.

Tamatuma kingunerisaanik piffissaliussaq qaangerneqarsimappat qinnuteqartoq  
aallarteqqinnissamut tapiissutisisinnaassanngilaq. Inuit inuussutissarsiornermut tunngasunik  
atortunik annaasaqartut imaluunniit atortunik annikitsumik ajoqusersimasut sukkanerpaamik  
inuussutissarsiuutiminnut uteqqinnissaat qulakkeerniarlugu piffissaliussaq eqqunneqarpoq  
peqatigisaanillu inuit pisinnaatitaanngitsut inuussutissarsiummut attuumassuteqanngitsunik  
tapiissutisisinnaannginnerat qulakkeerneqarluni.

Imm. 3-mut

Aalajangersakkami aalajangersarneqarpoq aallarteqqinnissamut tapiiffigineqarnissaq pillugu  
qinnuteqaat qinnuteqartup aningaasaqarnikkut inissisimaneranut uppersaammik kiisalu  
uppersaammik aamma inuussutissarsiummut tunngasumik annaasaqarsimanermit  
uppersaammik ilaqassasoq. Paasissutissat taakkua ass. tassaasinnaapput atortumut  
tammaasamut uppersaataat soorlu politiinut, Kalaallit Nunaanni Aalisarsinnaanermit  
Akuersissutinik Nakkutilliisoqarfimmut nalunaarutiginnissimaneq. Tassaasinnaavoq  
napparsimanermit uppersaataat nakorsamit nalunaarut allaluunniit.

Uppersaataat qanoq ittuunersoq apeqqutaanngilaq. Uppersaataat pisorpiaat pillugit  
naammattumik ilisimatitsinersut uppersaatanersorlu apeqqutaavoq.

Tamatuma saniatigut § 1, imm. 1, nr. 1-3 naapertorlugu atortoq ajoqusersimasoq, sakkumik  
annaasaqarneq napparsimanerluunniit il.il. inuussutissarsiummut atatillugu annaasaqarnermit  
pissutaasut uppersarneqassapput.

Imm. 4-mut

Soqutigisaqaqatigiit kattuffiata susassaqaqartup tusarniaaffigineqarnissaanut siunertaavoq  
qinnuteqaatit suliarineqarneranni suliassamut tunngasutigut siunnersorneqarnissaq, aqutsisut  
pisariaqartissimappassuk. Allaffissornermit annertuumik akornusiinani

tusarniaasoqarsinnaanngippat tusarniaaqaarani aalajangiisoqarsinnaavoq. Siunnersuummili § 1, imm. 1, nr. 4-mi aamma § 1, imm. 2-mi pisuni pineqartuni kattuffimmut attuumassutilimmut tusarniaaqaarnissaq avaqunneqarsinnaanngilaq. KNAPK aamma QAK maannakkut inuussutissarsiutigalugu aalisartunut aamma inuussutissarsiutigalugu piniartunut soqutigisaqaqatigiiffiuvoq attuumassutilik nunaateqarnermillu ingerlatsisunut SPS soqutigisaqaqatigiiffiulluni.

Taakkunannga tusarniaanermut akissutit pisussaaffiliisuunngillat, tassa tusarniaanermut akissut allaffitsigut aqutsisunut inatsisitigut pituttuisuunngilaq.

Nr. 4-mut (§ 3 a)

### § 3 a-mut

Imm. 1-imut

Qinnuteqaammik aalajangersimasumik naliliineq tunuliaqutaralugu aallarteqqinnissamut tapiissuteqartoqassaaq. Tamatuma saniatigut aallarteqqinnissamut aningaasartuutit akilernissaannut qinnuteqartoq naammattumik aningaasaqarnikkut piginnaasaqartut nalilerneqarpat aallarteqqinnissamut tapiiffigineqarnissaq pillugu qinnuteqaatip itigartinnissaanut Naalakkersuisut aalajangersakkakut periarfissalerneqarput.

Imm. 2-mut

Qinnuteqartoq siusinnerusukkut atortut ajoqusernerinut imaluunniit sakkut assingusut siusinnerusukkut annaanerinut aallarteqqinnissamut tapiissutisisimasoq tapiissutisinermiit ukiut pingasut kingorna siusinnerpaamik tapiissutisisinnaavoq.

Qinnuteqartoq assersuutigalugu 2025-mi nipisanniarnermi qassutit annaanerinut aallarteqqinnissamut tapiissutisisimappat qinnuteqartoq taanna nipisanniarnermi qassutinut annaasanut siusinnerpaamik 2028-mi tapiissutisisinnaavoq.

Aalajangersakkami periarfissat marluk akornanni toqqaanissaq pineqanngilaq matussertinnissamulliuna utaqqineq taamaallaat atortumut ajoqusernumut ataatsimut imaluunniit pisumi sakkumik tammaasaqarfiusumi ataatsimi atuuttoq. Tassa imaappoq inuk atortut ajoquserneranut ukiormi siullermi tapiissutisisoq ukiut aappassaanni atortut tammarsimaneranut tapiissutisinissamut suli periarfissaqartoq.

Atortut assingusut imatut paasineqassapput atornerqarfiata assingani atortut. Inuk qassutinik annaasaqarsimasoq piffissami tassani aquuteralamminik annaasaqarpat aallarteqqinnissamut tapiissutinik suli qinnuteqarsinnaassaaq.

Inatsimmi § 1, imm. 1, nr. 1-2 malillugu atortut ajoqusernerinut atortullu annaanerinut aalajangersagaq taamaallaat atornerqassaaq.

Nr. 5-imut (§ 4)

#### § 4-mut

##### Imm. 1-imut

Aalajangersakkami siunertaq tassaavoq inuussutissarsiutip ingerlanneranut pisariaqarluinnartumik pisoqartillugu tapiissutinik tunniussaqsinnaanissaq. Taamaattumik annaasanut tapiiffigeqqusanut tapiissutissat minnerpaaffilerneqarsimapput. Tapiissutissat annerpaaffilerlugit aalajangersaaneq ikkunneqarpoq tapiissutit innuttaasunut sapinngisamik amerlasuunut iluaqutaaniassammata. Tapiissutit qinnuteqarnerup kingorna tapiissutigineqassapput, tamatumalu kingunerisaanik qinnuteqaammik nassiussisimangitsunut ingerlataqartunut tapiissuteqartoqarsinnaanani.

Aalajangersakkami aallarteqqinnissamut tapiissutinik 2.000 kr.-niit 50.000 kr.-t tikillugit tunniussisoqarnissaanut periarfissiisoqarpoq. Taamaalillutik aalajangersakkami aallarteqqinnissamut tapiissutit minnerpaaffissaat annerpaaffissaallu aalajangersarneqarput. Qinnuteqartoq inuussutissarsiummut attuumassutilimmik 50.000 kr.-t sinnerlugilluunniit annasaqsimasoq, taamaalilluni aallarteqqinnissamut 50.000 kr.-nik tapiiffigineqarsinnaassaaq, ikinnerusunilli aamma tunineqarsinnaassalluni. Taamaalilluni qinnuteqartut aallarteqqinnissamut tapiissutisinissamut piumasaqaatinik naammassinnittut 50.000 kr.-t tikillugit annaasanik tamakkiisumik matussuserneqarnissaat aalajangersakkatigut qulakkeerneqanngilaq.

Oqaatigisami "aningaasanut inatsimmi aningaasaliissutaasut iluanni" paasineqassaaq aallarteqqinnissamut tapiissutinik tunniussisoqassappat aallarteqqinnissamut tapiissutisinissamut tunngavissanik aningaasanut inatsimmi kontomi aningaasanik naammattunik peqartariaqartoq. Taamaalilluni aningaasartuutitut matussutissanik aningaasanut inatsimmi aningaasanik naammattunik peqanngippat aallarteqqinnissamut tapiissutinik qinnuteqaatit itigartittussaataapput.

##### Imm. 2-mut

Aalajangersakkami siunertaavoq inatsisip siunertaanut tunngatillugu tapiissutit tunniunneqartut pitsaanerpaamik iluaqutigineqarnissaata qulakkeernissaa. Tassalu nassuiaatikkut qulakkeerneqassaaq tapiissutit siunertamut atorneqarnerat.

Tapiissutinik tunniussinermi erseqqissarneqassaaq nassuiaammut suut piumasarineqarnersut. Naalackersuisut taakkununga piumasaqaatit aamma nassuiaatit tunniunneqarnissaannut piffissarititaasut aalajangersassavaat. Nalunaartartussaataanerup malinneqarnissaa qulakkeerumallugu Naalackersuisut ilaatigut aalajangersinnaavaat, nalunaartartussaataaneq

eqqortinneqarsimangippat, § 5, imm. 1, nr. 2 naapertorlugu nalunaartussaataaneq malinneqangippat kingumut akiliisoqassasoq.

Nr. 6-imut

Inatsimmi tamarmi "Landsstyre" allanngortinneqassaaq imatut: "Naalakkersuisut". Aalajangersagaq Inatsisartut inatsisaata qallunaatoortaanut taamaallaat sunniuteqartoq, Inatsisartut inatsisaani taaguutit Namminersorlutik Oqartussat pillugit Inatsimmut naapertuutilersitsivoq, matumani inatsisinik atortitsisut – qallunaatullu – "Naalakkersuisut"-nik taaneqarlutik.

## § 2

Inatsisartut inatsisaat ulloq 1. januar 2025-mi atuutilerpoq.

<b>Siunnersuut inatsimmut atuuttumut sanilliullugu</b>	
<i>Oqaasertaliunneqartut atuuttut</i>	<i>Siunnersuut</i>
	<p><b>§ 1</b></p> <p>Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaanni nr. 3, 21.maj 2004-meersumi imatut allannguisoqarpoq:</p>
<p><b>§ 1.</b>Inuussutissarsiutigalugu aalisartunut, inuussutissarsiutigalugu piniartunut inuussutissarsiutigalugulu nunalerinermik ingerlataqartunut pigisat ajoquserneratigut, inuussutissarsiormi sakkugisat tammarnersigut imaluunniit napparsimanikkut imaluunniit allatut timikkut ajoquserluni sulisinnaajunnaarnikkut inuussutissarsiutiminnut tunngatillugu annaasaqarsimasunut Naalakkersuisut aallarteqqinnissamut tapiissuteqarsinnaapput.</p> <p><i>Imm. 2.</i> Tamatuma saniatigut silamik pissuteqartumik ajornartorsiuteqarneq, nalinginnaasumik inuussutissarsiornikkut aporfeqarnerit assigisaaluunniit pissutigalugit annaasaqarnermut imm. 1-imi inunnut taaneqartunut immikkut ittumik pisuni aallarteqqinnissamut Naalakkersuisut tapiissuteqarsinnaapput.</p>	<p><b>1.</b> § 1 imatut oqaasertalerneqarpoq: ” <b>§ 1.</b> Inuussutissarsiutigalugu aalisartunut, inuussutissarsiutigalugu piniartunut inuussutissarsiutigalugulu nunalerinermik ingerlataqartunut pigisat ajoqusernerisigut imaluunniit ukuninnga peqquteqartumik inuussutissarsiutiminnut tunngatillugu annaasaqarsimasunut Naalakkersuisut aallarteqqinnissamut tapiissuteqarsinnaapput: 1) atortut ajoquserneri uppersarsarneqarsimappata, 2) inuussutissarsiummut tunngasut atortut tammarsimappata, 3) uppersarsarneqarsinnaasumik ilungersunartumik napparsimasoqarpat allatigulluunniit uppersarsarneqarsinnaasumik ajoqusernermik kinguneqartumik timi atorlugu sulisinnaajunnaartoqarsimappat imaluunniit ingerlataqartup inuussutissarsiutaanut atassuteqartuni atortut aserorsimappata, imaluunniit</p>

	<p>4) inuussutissarsiornikkut nalinginnaasumik assigisaanilluunniit akornusertoqarsimappat.</p> <p><i>Imm. 2.</i> Silap pissusaata allanngorneranik allatigulluunniit ajunaarnersuarmik pisoqarneranik peqquteqartumik inuussutissarsiornikkut isertitat tamakkiisut imaluunniit annertuut sivikitsumik ilimasaarneqarnikkut annaaneqarpata imm. 1, nr. 1-4-mi taaneqartut saniatigut imm. 1-imi taaneqartunut inunnut aningaasatigut Naalackersuisut aallarteqqinnissamut tapiissuteqarsinnaapput.</p> <p><i>Imm. 3.</i> Imm. 1-2-mi pisunut uppernarsaanissaq pillugu Naalackersuisut sukumiinerusumik malittarisassaliorsinnaapput."</p>
<p>§ 2 Aallarteqqinnissamut tapiissutit ajoquserneq, annaasaqarneq, napparsimaneq imaluunniit sulisinnaajunnaarneq matussuserneqarsinnaasimanngippata imaluunniit nammineerluni sillimassutitigut pisortalluunniit sillimasiinerisigut imaluunniit nammineerluni pisortalluunniit tapiissutigisartagaasigut assigisaasigulluunniit matussuserneqarsinnaanngippata tunniunneqarsinnaapput.</p>	<p>2. § 2 imatut oqaasertalerneqarpoq: " § 2. Aallarteqqinnissamut tapiissutit tunniunneqarnissaannut piumasarineqarpoq § 1-imi ilaasut pisut matussuserneqarsimassanngitsut imaluunniit nammineerluni pisortalluunniit sillimasiinerinit matussuserneqarsinnaanngitsut.</p> <p><i>Imm. 2.</i> Ingerlatsisoq qinnuteqarnerup nalaanit ukiut pingasut sioqqullugit ukiumut agguaqatigiissillugit 250.000 kr.-nik ikinnerusunilluunniit isertitaqarsimappat peqatigisaanillu qinnuteqarnerup nalaanit ukiut pingasut sioqqullugit agguaqatigiissillugit 100.000 kr.-t amerlaqataannik ikinnerusunilluunniit nalilinnik pigisaqarpat Naalackersuisut</p>

	imm. 1 avaqqussinnaavaat aallarteqqinnissamullu tapiissuteqarlutik.”
<p><b>§ 3.</b> Aallarteqqinnissamut tapiissutinik qinnuteqaat Naalackersuisunut tunniunneqassaaq.</p> <p><i>Imm. 2.</i> Imm. 1 malillugu qinnuteqaateqarneq pissaaq Naalackersuisunit suliarineqarsimasoq qinnuteqaateqarnermut immersugassaaq atorlugu.</p> <p><i>Imm. 3.</i> Imm. 1 malillugu qinnuteqaammut ilanngunneqassapput qinnuteqaateqartup aningaasatigut inissisimaneranut uppernarsaatit kiisalu inuussutissarsiornermut atasumik pigisat ajoqusernerannut, annaasaqarnermut, napparsimanermit allatulluunniit timikkut ajoqusernikkut sulisinnaajunnaarnermut uppernarsaatit.</p> <p><i>Imm. 4.</i> Aallarteqqinnissamut tapiissutit tunniunneqartassapput sapinngisamik soqutigisaqaqatigiit kattuffiat susassaartoq tusarniaavigereerlugu. Pissutsini § 1, imm. 2-mi aamma § 4, imm. 2-mi taaneqartuni soqutigisaqaqatigiit kattuffiat tusarniaavigineqartassaaq.</p>	<p><b>3.</b> § 3 imatut oqaasertalerneqarpoq: " § 3. Aallarteqqinnissamut tapiissutinik qinnuteqaat Naalackersuisunut tunniunneqassaaq.</p> <p><i>Imm. 2.</i> Aallarteqqinnissamut tapiiffigineqarnissaaq pillugu qinnuteqarnermi Naalackersuisut qinnuteqarnermut immersugassiaat atorneqassaaq. Atortut ajoquserneri sakkulluunniit tammarneri pissutigalugit annaasanut aallarteqqinnissamut tapiiffigineqarnissamut qinnuteqaat, tak. § 1, nr. 1-2, ajoqusernerup tammaasaqarnerulluunniit pinerata kingorna qaammatsiutini ullut 30-t qaangiutsinnagit tunniunneqassaaq.</p> <p><i>Imm. 3.</i> Imm. 1 malillugu qinnuteqaammut qinnuteqartup aningaasaqarnikkut inissisimaffia pillugu uppernarsaat kiisalu inuussutissarsiornermut attuumasumik annaasaqarneq pillugu uppernarsaat ilaatinneqassaaq, takuuk § 1.</p> <p><i>Imm. 4.</i> Aallarteqqinnissamut tapiissutit sapinngisamik soqutigisaqaqatigiit kattuffiat susassaartoq tusarniaavigereerlugu tunniunneqartassapput. § 1, imm. 1, nr. 4-mi aamma § 1, imm. 2-mi pisuni taaneqartuni soqutigisaqaqatigiit kattuffiat tusarniaavigineqartassaaq."</p>
	<b>4.</b> § 3-p kingorna immikkoortup qulequtaa

	<p>sioqqullugu ilanngunneqarpoq "Aallarteqqinnissamut tapiissutit tunniunneqartarneri":</p> <p>” § 3 a. Aallarteqqinnissamut tapiissutit qinnuteqaammik aalajangersimasumik naliliineq tunuliaqutaralugu tunniunneqartassapput, tassunga ilanngullugu aallarteqqinnissamut aningaasartuutit akilernissaannut qinnuteqartoq nammineq naammattunik aningaasaateqarnerisq.</p> <p><i>Imm. 2.</i> Atortut assingisa aseroqqinnerannut tammaqqinnerannulluunniit, tak. § 1, imm. 1, nr. 1-2, siusinnerpaamik tunniussinerup kingorna qaammatisiutini ukiut pingasut qaangiunneranni aallarteqqinnissamut tapiiffigineqarnissamut qinnuteqartoqarsinnaavoq.</p>
<p>§ 4. Aallarteqqinnissamut tapiissutit minnerpaamik 2.000 kr. annerpaamillu 25.000 kr. ataasiaannarluni tunniunneqartarput.</p> <p><i>Imm. 2.</i> Pissutsini immikkut ittuni Naalakkersuisut imm. 1-imi taaneqartunit aningaasanik amerlanerusunik tunniussisinnaapput.</p> <p><i>Imm. 3.</i> Naalakkersuisut aallarteqqinnissamut tapiissutit tunniunneqarnerannut piumasarisinnaavaat tapiissutit qanoq atorneqarnerat pillugu kingornatigut qinnuteqaateqartoq nassuiaateqassasoq.</p>	<p>5. § 4 imatut oqaasertalerneqarpoq:</p> <p>" § 4. Aallarteqqinnissamut tapiissutit minnerpaamik 2.000 kr. annerpaamillu 50.000 kr. ataasiaannarluni tapiissutit tunniunneqassapput. Aningaasanut inatsimmi aningaasaliissutigineqartut iluanni aallarteqqinnissamut tapiissutisisoqarnissaanut taamaallaat aalajangiisoqarsinnaavoq.</p> <p><i>Imm. 2.</i> Naalakkersuisut aallarteqqinnissamut tapiissutit tunniunneqarnerannut piumasarisinnaavaat qinnuteqaateqartoq tapiissutit qanoq atorneqarnerat pillugit kingornatigut Naalakkersuisut piffissaliussaata iluani nassuiaateqassasoq."</p>

	<b>6. Inatsimmi tamarmi "Landsstyre" imatut allanngortinneqassaaq: "Naalakkersuisut".</b>
	<b>§ 2</b> Inatsisartut inatsisaat 1. januar 2025-mi atuutilissaaq.

**Tusarniaanermut akissutit pillugit allakkiaq**

Siunnersuut Naalakkersuisut tusarniaanermi nittartagaanni piffissami 6. juni 2024-mit 5. juli 2024 ilanngullugu tamanut saqqummiunneqarnikuvoq, soorluttaa siunnersuut piffissami tassani tusarniutigineqarsimavoq ukununnga tulliuttutut allanneqartunut:

- Kalaallit Nunaanni Sulisitsisut
- SIK
- KNAPK
- SQAPK
- NUSUKA
- QAK
- Aalisarnermut siunnersuisoqatigiit ilaasortaalu
- Grønlandsbanken
- Bank Nordik
- Pinngortitaleriffik
- Royal Greenland
- Kommuneqarfik Sermersooq
- Kommune Qeqertalik
- Kommune Kujalleq
- Qeqqata Kommunia
- Avannaata Kommunia

Tusarniaanermi piffissaliussap naanerata kingorna tusarniaanermi akissutinik tusarniaaffigineqartunit tallimaniit Naalakkersuisut tigusaqarsimapput, ataani allassimasunik oqaaseqaateqarfigineqartut. Tassunga atatillugu oqaatigineqassaaq tusarniaanermi akissutit taamaallaat pingaaruteqarneranik naliliineq tunuliaqutaralugu pingaarnersiorlugit issuarneqarmata. Tusarniaanermi akissutinut Naalakkersuisoqarfiup oqaaseqaatai uingasumik allanneqarput.

## **1. Avannaata Kommunia (AK)**

AK isumaqarpoq piffissap ukiut pingasut iluanni ajoqusernerup assinganut ataatsimut tapiissutinik qinnuteqarnissaq periarfissaasariaqartoq. AK-mit aamma oqaatigineqarpoq 50.000 kr.-nik qaffaaneq pitsaasoq, kisiannili aalisarnermi piniarnermilu atorlut akitsorsimaqimmata, pisariaqartutigut tulluarsaasoqartariaqartoq.

*Ajoqusernernerut assigiinnut tapiissuteqaqqinnissamut qummut killiliusaaq siunnersuummi eqqunneqarpoq. Tamanna ilaatigut eqqunneqarpoq tapiissutisinissamut aaqqissuussinerit pillugit malittarisassanik aaqqissugaasunik avaqqutaarisarnerit pinngitsoortinniarlugit. Suliniummut pissutaavoq ilaatigut uppersaruminaatsunik qassutit tammarneri pillugit aallarteqqinnissamut tapiissutit pillugit qinnuteqaatinik assigiinnik ukiuni arlalinni tiguisoqartarsimammat. Naalackersuisut isumaqarput aallarteqqinnissamut tapiissutit siumut sammisumik qulakkeernissaannut suliniut pisariaqartuusoq AK-llu tusarniaanermi akissutaa tunuliaqataralugu siunnersuummi allannguisoqarnani.*

## **2. Kalaallit Nunaanni Sulisitsisut (GE)**

Siunnersuummut § 1, imm. 1, nr. 2-mut atorlut tammarnerinut uppersaanissamut piimasaqaatip erseqqissarneqarnissaa GE-mit kissaatigineqarpoq.

*Naalackersuisut aalajangersagaq imatut allanngortippaat "2) inuussutissarsiummut tunngasut atorlut tammarsimappata". Allannguinermi taamaalilluni erseqqissarneqarpoq aallarteqqinnissamut tapiissutit suulluunniit annaasat uppersarneqarsimasut tunuliaqataralugit pissasoq. Aalajangersakkamut nassuiaatini uppersaanissamut piimasaqaammut assersuutit arlallit erseqqissaatigineqarput.*

Siunnersuummut § 1, imm. 1, nr. 3-mut GE-mit siunnersuutigineqarpoq aalajangersagaq atorunnaassasoq.

*Matumuuna aalajangersagaq naapertorlugu iluarsineqarpoq.*

Siunnersuummut § 2, imm. 1-imut ajoqusernerit sillimaserneqarsinnaanngitsunut assigiinngitsunut assersuuteqarnissaq GE-mit kissaatigineqarpoq.

*Aalajangersakkami oqaaseqaatit tassunga naapertuuttunngorlugit allanngortinneqarput.*

Siunnersuummut nalinginnaasumik nassuiaatini immikkoortoq 2.1, immikkoortut pingajuanni kinaassusersiunngitsumik naliliinissamut tunngaviup erseqqissarneqarnissaa GE-mit kissaatigineqarpoq.

*Siunnersuummi § 2, imm. 2-mi 250.000 kr.-nut appasinnerusunulluunniit aningaasat killilerneqarneri ikkunneqarpoq. Tamanna isumaqarpoq ingerlataqartoq ukiumut 250.000*

*kr.-nik taakkuluunniit inorlugit ukiumut isertitaqartoq aallarteqqinnissamut tapiissutisinissamut eqqarsaatigineqarsinnaasoq, taanna sillimmasiisimannikkaluarpalluunniit. Tamatumali assigiinnangilaa pineqartup piviusumik aallarteqqinnissamut tapiissutinik pissarsinissaa. Matumani nalilersueqqissaarneq sulitunngavigineqassaaq.*

Siunnersuummut § 4, imm. 2-mut GE-mit oqaatigineqarpoq 50.000 kr.-t sinnerlugit tapiissutisinissamut piunasaqaatit erseqqissuusariaqarlutillu kinaassusersiortuusariaqanngitsut.

*Tusarniaanerp kingorna 50.000 kr.-nit amerlanerusunik tapiissuteqarnermut tunngavik siunnersuummit peerneqarpoq.*

### **3. KNAPK**

KNAPK siunnersuummut § 1, nr. 4-mut siunnersuutigaa paatsuinerit pinngitsoorniarlugit aalajangersagaq allamik oqaasertalerneqassasoq.

*Siunnersuut tamanna naapertorlugu allanngortinneqarpoq.*

Siunnersuummut § 3, imm. 2-mut KNAPK-mit oqaatigineqarpoq inuit tamaviaarnartumik napparsimasut imaluunniit ajunaarnersuarnut eqqaanartunut pissutsinik nalaataqartut ullunik 30-nik piffissaliussamik eqqorneqarsinnaasut.

*Oqaatigineqarpoq qinnuteqarnissamut ullunik 30-nik piffissaliussamik piunasaqaat inatsimmi § 1, imm. 1, nr. 1-2-mi eqqaaneqartunut taamaallaat atuuttoq, tamatumalu kingunerisaanik napparsimaneq ajunaarnersuarmullu eqqaanartut pisut qinnuteqarnissamut piffissamut ilaatinneqarnatik.*

### **4. QAK**

Siunnersuummi § 3, imm. 4-mut oqaaseqaatigineqartunut ilaanissaq QAK-mit kissaatigineqarpoq.

*Nassuiaatit tamanna naapertorlugu allanngortinneqarput.*

Atortut assingisa aseroqqinnerat tammaqqinneralluunniit pillugit § 3 a, imm. 2-mut tunngatillugu QAK-p tamatuma saniatigut oqaatigaa Naalackersuisut aallarteqqinnissamut tapiiffigineqarnissamut qinnuteqaatip killilernissaanut mianerisariaqartut. QAK assersuutitut eqqaavaa qassutit bundgarnit arferit pissutigalugit ajoquserarsimasut annaaneqarlutilluunniit. QAK isumaqarpoq qinnuteqarnissamut piffissaliussamik inatsisitigut aalajangiineq siunertaanngitsumik qinnuteqaatinut amerlasuunut killiliisoq. Kattuffiup siunnersuutigaa qinnuteqaatit ataasiakkaarlugit naliliiffigineqartarnissaat, qinnuteqartup qinnuteqaamminik

assilissatigut uppersaanikkut tunngavilersuisinnaanera pillugu malittarisassat eqqunneqarlutik.

*Immikkoortoq 1, Avannaata Kommuniata akissutaanut innersuussisoqarpoq.*

## **5. Kommuneqarfik Sermersooq (KS)**

Aallarteqqinnissamut tapiissutit 50.000 kr.-niit 75.000 kr.-nut qaffannissaat KS-imit kissaatigineqarpoq. Inuussutissarsiutigalugu piniartut aningaaserivimmi taarsigassarsinissamut periarfissaqanngimmata taakkulu tunitsivissatut periarfissaat killeqartorujussuummata, soorlu aamma nappaammik eqqorneqarunik imaluunniit motoriiarunik nunagisaminnilu iluarsaassisoqarnissaanut iluamik periarfissaqaratik, tamannalu sulii qaavatigut unammillernartitsilluni.

*Kommunip oqaaseqaatai naapertorlugit siunnersuummi Naalakkersuisut allannguinngillat.*